

TERRA SANCTA.



Aec particularis Syriæ prouincia primum Terra Chnaan, deinde terra Israël & Iudæa dicta fuit, ac propter Philistiim seu Palestinum cohabitationem, Palestina. Clauditur mari mediterraneo, Iordane fluuiio, monte Libano & termino Aegypti. Metropolis eius est urbs toto orbe memorabilis IERUSALEM, princeps prouinciarum, possessio patriarcharum, prophetarum & Apostolorum mater, iniciatrix fidei & gloria populi Christiani, sita in terra optima, quæ olim habitatoribus suis lacte & mel fluens, nunc uero uniuerso orbi remedia salutis & uitæ porrigit alimenta. De Zion enim egressa est lex, & uerbum domini de Ierusalem. Hanc dominus ab initio singulari supra alias terras fauore prosequi dignatus fuit. Cum habitatores eius essent recti & optimi, terra quoque ipsa uariarum operum fuit diues, frugibus fertilis, aquis illustris, optima balsamo & omni rerum genere abundans. Quando uero dei obliti in uitia proruebant colebantque idolola, nulli non fuit pesti obnoxia. Bestijs malis patebat introitus, lepra passim omnia corripiebat, nedum corpora hominum, uerum & habitacula atque uestes eorum, hostilis gladius undique habitatoribus imminabat, fames, sitis, clausura cœli, multiplexque illa maledictio, quæ Deut. 27. describitur, fines eius peruagabatur, ut iam non terra optima sed infelicissima, inculta, sterilis, omni dulcedine carens, suos habitatores deuorans, ænea, dura & tota horrida esse diceretur, qualis & in hunc usque diem esse deprehenditur ab ijs qui eam peregre accedunt. Caterum Iordanis efficit nonnullos lacus in terra, præsertim eum quem uocant mare Galileæ: Lacum Samachonitem, qui æstate siccatur in paludes, & sylua qua obducitur, in festa est leonibus. Porro lacus Asphaltis, quinque urbium subuersione memorabilis, fumosus est, & nullum corpus animantis recipit, sed tauri & cameli in eo fluitant, etiam homines nandi imperiti, ubi ad ilia usque in eum processerint, attolluntur. Vallis syluestris est & plena salinis, quam asphaltis lacus inundauit: antiquitus uero cultissima erat, adeo ut ob felicitatem paradiso dei conferretur.

Mansit eius species apud Iericho & Engadi:
ubi adhuc palmeta sunt & horti
balsami.